

შიდა ქართლის სახელმწიფო რწმუნებული მოსახლეობასთან შეხვედრებს აგრძელებს

30 აგვისტო 2022

შიდა ქართლის სახელმწიფო რწმუნებული მიხეილ შაყულაშვილი ქარელის მუნიციპალიტეტში საოკუპაციო ხაზთან მდებარე სოფელ კოდაში იმყოფებოდა და მოსახლეობას შეხვდა. რწმუნებულმა პირადად მოისმინა ადგილობრივებისთვის მნიშვნელოვანი საკითხები და ინიციატივები. „მინდა, თითოეულ სოფელში მივიდე და პირადად შევხვედე ადგილობრივ მოსახლეობას, უშუალოდ მათგან მოვისმინო სოფლისთვის მნიშვნელოვანი საკითხები, ინიციატივები თუ იდეები. კოდა საოკუპაციო ხაზის სოფელია და აქაურ მოსახლეობას განსაკუთრებული ყურადღება სჭირდება. აღსანიშნავია, რომ ქარელის მუნიციპალიტეტში გამყოფ ხაზთან მდებარე სოფლებიდან საგზაო ინფრასტრუქტურა მხოლოდ კოდაში იყო მოსაწესრიგებელი და წელს ეს პროექტიც დასრულდა. ადგილობრივებს განახლებული ინფრასტრუქტურით სარგებლობა უკვე შეუძლიათ.“ - აღნიშნა მიხეილ შაყულაშვილმა.

ქარელის მუნიციპალიტეტში გამყოფ ხაზთან მდებარე სოფლების საცხური-აბანო-კოდას 3,6 კმ-იანი გზის მონაკვეთისა და ხიდის სრული რეაბილიტაცია განხორციელდა. პროექტი 2021 წელს დაიწყო და წელს დასრულდა. სამუშაოები რეგიონებში განსახორციელებელი პროექტების ფონდიდან და ადგილობრივი ბიუჯეტიდან 1 486 010 ლარით დაფინანსდა. მიმდინარე წელს მოეწყო მინი სტადიონი. გარდა ამისა, „სოფლის მხარდაჭერის პროგრამის“ ფარგლებში სკვერის მოწყობა მიმდინარეობს.